

La Scola e i Mondiei

L logo e la mascotte, dessegné dai studenc Fabian Mosele e Alice Stroppa

“I Mondiai Junior l'é na gran ocajion che volon desfrutar al miec, tant dal pont de veduda sportif che turistic. Dant da noi l'é stat endrezà te lesc de aut livel, per chest sion dò che vardon a ogni più picol detai, con l didament de le istituzion e de dute le realtà del teritorie e col suport prezios di voluntares.”

Coscita aea dit l president del Comit de endrez di Mondiei Junior di Schi 2019, Davide Moser, tel prejentèr chesta gran endesfida che noscia val se à metù dant, e che ades é dassen vejina: ai 18 de firé la zerimonia de inaudazion orirà defat l siparie sun chest event.

Ampò, apede a sport e turism, l'é n auter setor che enscin dal scomenz se à leà a fil strent te chisc Mondiei, e l'é chel de la Scola de Fascia.

La Sorastanta Mirella Florian, spervaja che chest event posse ge sporjer na bela oportunità a si studenc, l'à sport subito la colaborazion de la Scola al Comit



N ciuzé da schi bianch e brun sconet te la crepa à vent l concurs e l'é stat cernù desche logo.

de endrez, che l'à palesà più outes l'emportanza de chesta sinergia.

Jà del 2017 i studenc à tacà a se dèr jù ti concorsc metui a jir tel Liceo artistic per troèr fora l logo e la mascotte de chest gran event.

Coscita desche logo l'é stat cernù chel ciuzé da schi stilisà bianch e brun, che se “scon” te la crepa, simbol de sport e mont leé te n raport sinergich e respetous, dessegnà da Fabian



La Sorastanta con Carlo Ganz, del Comit de endrez di Mondiei, a la premiazion de Fabian Mosele, autor del logo.

Mosele, enlouta apontin student de la Scola de Fascia.

E per la mascotte l'é stat aprijia più che dut la gustegola fegura dessegnèda da la studenta del Liceo artistic Alice Stroppa: n fioch de neif brun chièr, con n mus grignolent,



Neif, la mascotte ofiziala de l'event sportif fascian.

che se got sui schi: “Neif” l'é doventà coscita la mascotte ofiziala di Mondiei, protagonista ence de n bel projet de solidarietà con la Fondazione de l'Ospedèl di bec Anna Meyer de Firenze.

Ades la colaborazion va amò inant: i studenc più gregn de la Scola de Fascia i se endreza defat a tor pèrt a l'event en alternanza scola-lurier. Chi di Licees linguistic e scientific



L President di Mondiei Davide Moser e la Sorastanta Mirella Florian a la premiazion de Alice Stroppa.

podarà compagnèr i atlec, e chi del Ski & Ice College i se darà jù per didèr sui percorsc e tel control sui portoes. Ma ence i più picoi no menciàrà de tor pèrt per sostegnir chisc atlec mondiei pech più gregn che ic. (lg)